

## Božidar Ivezić, geod. inž.



Božidar Ivezić rođen je 12.12.1940. godine u Sarajevu, od oca Petra i majke Marije rođ. Lockner. Preminuo je 27.02.2023. godine u Sarajevu, gdje je i sahranjen 2.3.2023. godine na gradskom groblju Sveti Mihovil.

Tijekom školovanja stekao je izvanredno obrazovanje i znanje. Geodetsku srednju tehničku školu u Sarajevu upisao je 1958. godine i uspješno završio 1961. godine. Odmah po maturiranju upisuje redovni studij na Višoj geodetskoj školi u Sarajevu, u 2. generaciji studenata te Škole. Dana 26.10.1963. godine uspješno je okončao studij polaganjem diplomskog ispita i stekao diplomu geodetskog inženjera.

Po završetku školovanja zapošljava se u Geodetski zavod u Sarajevu gdje radi na poslovima osnovnih geodetskih radova. Potom odlazi na odsluženje vojnog roka u Zadar i po završetku zapošljava se i radi (3 godine) u katastarskom uredu u Kaknju.

Poslije toga ponovo se vraća u Geodetski zavod Sarajevo, a 1977. godine prelazi u Zavod za izgradnju Grada Sarajeva. Tu je raspoređen u Sektor za katastar komunalnih uređaja, na radno mjesto samostalnog referenta za komunalne poslove, gdje vodi operat telekomunikacione mreže za čitavo i šire područje Grada Sarajeva.

Početak rata 1992. godine postavljen je na mjesto pomoćnika glavnog direktora Zavoda za izgradnju Grada (kasnije Kantona) Sarajeva u Sektoru za katastar komunalnih uređaja. Na toj funkciji ostaje do odlaska u mirovinu 2005. godine.

Skladan porodični život proveo je sa suprugom Mirjanom, s kojom je dobio sina Petra i kćerku Dolores.

Radne kolegice i kolege iz Sektora za katastar komunalnih uređaja su se od uvaženog kolege Božidara Ivezića oprostili posljednjim pozdravom objavljenim u dnevnom listu „Oslobođenje“:

*Poštovani!*

*Bili ste jedan od najvećih ljudi ovoga grada, u svakom smislu.*

*Dali ste nemjerljiv i neizbrisiv trag u oblasti izrade i održavanja Katastra komunalnih uređaja Zavoda za izgradnju Kantona Sarajevo.*

*Vaš plemeniti lik i djelo ostat će vječno u našim srcima.*

*Veliko HVALA!*

*Tvoj Katastar*

*Viktor Konaj*